

Organistitik amigaateqarneq, suullu peqqutaanersut pillugit Naalakkersuisut UKA2023-mi agguassassamik nalunaarusioqqullugit Inatsisartut aalajangiiffisassaattut siunnersuut. Nalunaarusiami akissarsianut tunngasut, ilinniartitsinikkullu neqeroorutaasinnaasut il.il. qulaajarneqassapput, kiisalu qanoq iliornikkut amigaateqarneq qaangerniarneqarsinnaanersoq pillugu Naalakkersuisut siunnersuuteqartoqassallutik.

(Inatsisartunut ilaasorta Siverth K. Heilmann, Atassut)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartut aalajangiiffisassaattut siunnersuuteqartoq qutsavigaara, tassanilu pineqarpoq organistitik amigaateqarneq, suullu peqqutaanersut pillugit Naalakkersuisut nalunaarusioqquneqassasut, tassungalu atatillugu akissarsianut tunngasut ilinniartitsinikkullu neqeroorutaasinnaasut qulaajarneqarnissaat, kiisalu qanoq iliornikkut amigaateqarneq qaangerniarneqarsinnaanersoq pillugu siunnersuuteqarnissaq.

Ilagiit innuttaasunut amerlaqisunut pingaaruteqartorujussuupput, tussiarnerullu pattaqiaq atorlugu ingiallorneqarnissaa ilagiinnut pingaaruteqarpoq.

Nunatsinni sumiiffinni arlaqartuni organistitik amigaateqarneq Naalakkersuisunit ilisimaarinearpoq. Ilagiinnit kisitsisit nutaanerpaat tunngavigalugit 2022-mi ulloq 24. marts organistitik qaammammusiiallit 25-upput, sumiiffinnilu 42-ni organistitik amigaataapput, taartaasartumilluunniit kiffartuussisoqarlutik. Tamatumunnga atatillugu organistitut sulineq ilaannakortumik suliffiummat Naalakkersuisut erseqqissaatiginiarpaat, tassami isumaqatigiissuteqarfiusoq atuuttoq malillugu atorfeqartunut ukiumut suliffiusussat nal. ak. 900-ummata, tamannalu qaammammut nal. ak. 80-iuummat. Biskopeqarfik nalunaaruteqarportaaq ukioq manna ulloq 24. marts oqaluffimmi nipilersortartut arfineq-pingasut ilinniagaqarnermik ingerlataqartuusut, taakkulu 2022-mi oktobarip naalernerani soraarummeernissaat naatsorsuutigineqartoq, 2023-milu ilinniagaqartut nutaat aallartittussaasut.

Organistitik amigaateqarnerup qanoq qaangerneqarsinnaaneraniq misissuinissamik kissaateqarnermut Naalakkersuisut isumaqataapput, tamannalu tunngavigalugu siunnersuutip akuerineqarnissaa inassutigalugu.